

Terengganu fokus sukan berbasikal

Dijangka mampu menjadi penyumbang pingat terbanyak pada Sukma 2016 di Sarawak nanti

■ NORADILA MAHAMAD

KUALA TERENGGANU - Sukan berbasikal dijangka akan menjadi penyumbang pingat terbanyak kontinjen Terengganu pada Sukan Malaysia (Sukma) 2016 di Sarawak, yang bakal bermula 22 hingga 31 Julai tahun depan.

Timbalan Pengarah Majlis Sukan Negeri Terengganu (MSNT), Ibtisam Amin Busu berkata, sukan-sukan lain juga tidak kurang hebatnya termasuk acara memanah, menembak, olahraga, pencak silat, sepak takraw dan banyak lagi.

"Boleh dikatakan hampir semua jenis sukan kita meletakkan sasaran tersendiri, tetapi kalau ditanya fokus utama sudah tentu kita jangka bakal akan membawa pulang banyak pingat.

"Buat masa ini, sekurang-kurangnya semua pasukan telah mencapai 70 peratus persiapan untuk menghadapi Sukma 2016," katanya pada Ujian Kecerdasan Perdana Kali Ke-2 Atlet Sukma Terengganu di Stadium Sultan Mizan, Gong Badak.

Dalam masa sama, Ibtisam berkata, pihaknya juga yakin mam-



Para atlet sedang melakukan latihan kecerdasan pada Ujian Kecerdasan Perdana Kali Ke-2.

pu menjadi kontinjen terbaik pada Sukma itu nanti, biarpun tanpa beberapa acara yang tidak dipertandingkan seperti kenu, judo dan lawan pedang.

"Saya yakin kontinjen Terengganu mampu melakukan yang terbaik walaupun beberapa acara sasaran kita yang tidak disenaraikan.

"Buktinya, pada Sukma 2012 di

Pahang, acara kenu juga tidak ada tetapi kontinjen ini (Terengganu) telah membuktikan mereka menjadi kontinjen terbaik dengan mendapat 62 pingat sedangkan ketika ada (kenu) sebelum itu hanya memperoleh 61 pingat.

"Tetapi memang tidak dinafikan, sekiranya acara kenu dipertandingkan, sudah pasti jumlah pingat akan

bertambah," katanya lagi.

Ibtisam Amin juga memberitahu, elaun latihan atlet yang tersenarai menyertai Sukma 2016 bertambah daripada RM130 kepada RM390 sebulan yang akan dibayar bermula Januari tahun hadapan.

"Mereka (atlet) yang bakal ke Sukma 2016 akan menikmati kenaikan elaun seperti yang dijanjikan ke-

rajaan negeri sebelum ini," jelasnya.

Kenaikan elaun berkenaan diharapkan menjadi titik semangat kepada para atlet supaya dapat melakukan latihan serta bekerja lebih kuat untuk memberi pingat terbanyak kepada kontinjen.

Sementara itu, berhubung latihan kecerdasan yang turut dibantu sukarawan dari Universiti Sultan Zainal Abidin, melibatkan seramai 395 atlet terdiri daripada 251 atlet lelaki dan 144 perempuan termasuk atlet kenu, judo dan lawan pedang.

"Mereka (atlet kenu, judo dan lawan pedang) juga terlibat sama walaupun tidak menyertai Sukma 2016 sebagai latihan kepada mereka untuk pertandingan-pertandingan lain pada masa akan datang.

"Latihan kecerdasan yang dilakukan (semalam) selama hampir empat jam ini adalah persiapan atlet untuk fasa kedua sebelum ke peringkat akhir pada Januari depan bagi menentukan atlet yang benar-benar layak ke Sukma 2016," katanya.

Sebanyak 24 acara sukan dipertandingkan pada Sukma 2016 di Sarawak yang bermula 22 hingga 31 Julai nanti.